

## Morning Regional Dogri News Bulletin, 11<sup>th</sup> August 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

### Headlines

1. प्रधानमंत्री नरेन्द्र मोदी होर अज्ज नमीं दिल्ली च बक्ख-बक्ख फसलें दियां 109 सुधरी दियां उन्नत बनदियां जारी करगंन जेहड़ियां मता झाड़ देने आलियां, मकामी आवोहवा दे माफक ते जैविक सुरक्षा कन्नै लैस होंगन।
2. अनंतनाग जिले च छिड़े दे इक टाकरे च 2 सैनिक शहीद, इक आम आदमी दी मौत।
3. जम्मू कश्मीर प्रशासन नै आँदे विधानसभा चुनां कोला पैहले पैहले विधानसभा परिसरें दी मरम्मत, रखरखाव ते इनेंगी सोआरने लेई कमर कस्सी लैती ऐ।
4. इस ब'रे अजें तोड़ी 5 लक्ख 70 ज्हार 569 श्रद्धालु अमरनाथें दी पवित्र गुफा च मत्था टेकी चुके दे न।
5. बरामुला जिले दिएं 10 ज्हार नोजवान कुड़िएं किट्ठे इक कश्मीरी लोक नाच करियै विश्व रिकार्ड कायम कीता ऐ।

<><><><><><>

### PM-Crops

प्रधानमंत्री नरेन्द्र मोदी होर अज्ज नमीं दिल्ली च मता झाड़ देने आली ओकड़ी फसलें दियां 109 किस्मां जारी करगंन जेहड़ियां बड़े मते पोषक तत्वे कन्नै भरोची दियां होने दे कन्नो कन्नी जलवायु परिवर्तन दे असर गी झल्ली सकने च बी सक्षम होंगन। कार्यक्रम दरान प्रधानमंत्री होर करसानें ते साईंसदानें कन्नै गल्लबात बी करगंन। प्रधानमंत्री हुंदे दफतरै इक ब्यान च प्रधानमंत्री हुंदे दफतरे जानकारी दित्ती जे 109 किस्में गी जारी कीता जाग, जिस च 61 फसलां, इंदे च 34 फसलां ते 27 बागवानी सरबंधी फसलां शामिल न। मौके पर जिमीं च लाने आलिएं फसलें च बक्ख-बक्ख अनाज ते मुट्टा अनाज, दालां, गन्ना, कपास ते होरने फसलां शामिल नं बागवानी फसलें च फल, सब्जियां, फुल्ल आले बूहटे, मसाले ते औषधि आले बूहटे खास तौरा पर शामिल न।

<><><><><><>

## President Timor

राष्ट्रपति द्रौपदी मुर्मू होर त्रऊं देशें फिजी, न्यूजीलैंड ते तिमोर लेस्ते दी यात्रा मुकम्मल करने दे परैंत नमीं दिलली लेई रवाना होई गेइयां न। यात्रा दे खीरी गेड़ च राष्ट्रपति होरें तिमोर लेस्ते दे दौरे दरान उनेंगी उत्थूं दे सब्बने शा बड़डे नागरिक सम्मान ग्रैंड कॉलर ऑफ ऑर्डर ऑफ तिमोर लेस्ते कन्नै सम्मानत कीता गेआ। राष्ट्रपति डिली च उत्थूं दे राष्ट्रपति ते प्रधानमंत्री हुंदे कन्ने दपक्खी बैठकें च चर्चा कीती। दौनें मुल्खें आपसी सैह्योग पर त्रै सैह्यमति पत्रें पर दस्तखत बी कीते। तिमोर लेस्ते दे राष्ट्रपति जोस रामोय-होर्ता होरें राष्ट्रपति मुर्मू हुंदे सम्मान च कल सरकारी धाम दा सरिस्ता कीते दा हा। राष्ट्रपति मुर्मू होरें दौनें मुल्खें बश्कार सरबंधे गी निग्गर बनाने दा धेइया पक्का करदे होई “दिल्ली ते डिली बश्कार” रिश्ते गी बढ़ावा देने पर जोर दित्ता।

<><><><><><>

## Anantnag Operation

अनंतनाग जिले च कल होए दे टाकरे दरान दऊं जवाल शहीद होई गे ते इक आम नागरिक दी मौत होई गेई। कोकरनाग आले जंगली इलाके च होए दे टाकरे च 2 जवान जख्मी बी होई गे न। टाकरे च हवलदार दीपक कुमार यादव ते लांस नाइक प्रवीण शर्मा होर शहीद होई गे। दपक्खी गोलीबारी च जख्मी होए दे इक आम नागरिक नै अस्पताल च दम त्रोड़ी दित्ता। सेना प्रमुख जनरल उपेन्द्र द्विवेदी ते होरने आला अधिकारिण शहीदें गी श्रद्धांजलि दित्ती ऐ। एहदे शा पैहले सुरक्षाबलें आस्सेआ कोरनाग दे जंगली इलाके च आतंकवादिण दी धर-पकड़ लेई चलाया गेदा अभियान उसलै टाकरे च तब्दील होई गेआ जिसलै छप्पियै बैठे दे आतंकवादिण घात लाइयै हमला करी दित्ता। सुरक्षाबलें दा अभियान अजें जारी ऐ। तोआई दऊं हफते पैहले कुपवाड़ा च पाकिस्तानी बैट दे हमले च इक जवान वीरगति गी प्राप्त होआ हा ते मेजर सनें 4 जनें जख्मी होए हे। एहदे शा पैहले डोडा च 4 फौजी जवान ते इक पुलस अधिकारी टाकरे दरान शहीद होई गे हे।

<><><><><><>

## CS Assembly Complexes

जम्मू कश्मीर च विधानसभा चुनाएं दिएं बधदिणें संभावनाएं दे चलदे मुख्ख सचिव अटल डुल्लू होरें कल सरबंधी सब्बने मैह्कमें गी आखेआ जे ओ जम्मू ते श्रीनगर दौनें थाहरें विधानसभा परिसरें दी मरम्मत, रंग रोगन ते सवारने दा कम्म समेबद्ध तरीके नै शुरू करी दित्ता जा। उनें सद्ने च साउंड सिस्टम, इंटरनेट दी सुविधा, अग्ग कोला बचाह आले इंतजाम, बिजली ते होर दुइणें जरूरी सुविधाएं दे बारे च दिक्ख सुन करने ते लोड़चदे प्रबंधन करी रखने पर जोर दित्ता ते आखेआ जे सब्बै इंतजाम जिन्ना तौले मुमकिन होए कीते जान। उनें असेंबली दे स्पीकर, डिप्टी स्पीकर ते विपक्ष दे नेता बगैरा लेई कक्ष दी पैहले गै तैआर करी रखने दा निर्देश दित्ता। एहदे इलावा उंदे लेई गड्डिणें दी बवस्था ते होर सुविधाएं गी बी तैआर रखने पर जोर दित्ता। डुल्लू होरें राजधानी आले दौनें शैहरें च एमएलए होस्टलें दी मरम्मत करने दा बी निर्देश दित्ता। उनें आखेआ जे एह

सारे इंतजाम विधानसभा चुनां मुक्कने कोला पैहले पैहले पूरे करी लैते जाने लोडचदे। मुख सचिव हुंदी अध्यक्षता च एह बैठक भारतीय चुनां आयोग दे जम्मू कश्मीर दे दऊं रोजा दौरे दे बाद, कल लग्गी जेहदे च इनें सब्बने तैआरिएं बारे गल्लबात कीती गई।

<><><><><><>

## Div.Com I-Day Arrangement

जम्मू दे डिवीजनल कमीशनर रमेश कुमार ते पुलसै दे अतिरिक्त महानिदेशक आनंद जैन होरें कल जम्मू दे मौलाना आजाद स्टेडियम दा दौरा लाया ते उत्थें चला'रदिएं औंदे स्वतंत्रता दिवस लेई तैआरिएं दा जायजा लैता। डिवीजनल कमीशनर होरें बक्ख—बक्ख मैहकमे आस्सेआ कीते जा'रदे प्रबंधें दी बी समीक्षा कीती, जिंदे च लोकें दे बौहने दी बवस्था, सुरक्षा बंदोबस्त, गड्डियां खडेरने लेई पार्किंग दी बवस्था, एंअ्री पास, आम लोकें ते प्रतिभागिउं गी आहने लेई जोने लेई गड्डिएं दी बवस्था, बिजली पानी दा इंतजाम, साफ सफाई, सजावट, रंग रोगन, शौचालयें दी सुविधा ते होर दुए प्रबंध शामिल न। उनें सब्बने मैहकमे गी आखेआ जे सब्बे बंदोबस्त समें सिर मुकम्मल कीते लैते जान तां जे इस राष्ट्रीय पर्व गी पूरी चाल्ली सुरक्षत, रमानदारी ते बवस्था आले ढंगै सिर मनाया जाई सकै।

<><><><><><>

## NCC Cadts ISRO

एनसीसी दे 50 कैडेटें सेंटरल यूनिवर्सिटी कैंपस जम्मू स्थित इसरो केन्द्र दा दौरा लाया। इस दरान इनें कैडेटें गी सतीश धवन स्पेस सेंटर गी दिक्खने दा मौका थोआ। इस दरान कैडेटें गी बड़ी मती आधुनिक तकनीकें, वैज्ञानिक उपकरणें बगैरा बारे दस्सेआ दसाया गोआ।

<><><><><><>

## Amarnath Yatra

दक्खनी कश्मीर दे अनंतनाग जिले च स्थित श्री अमरनाथ जी दी गुफा च इक जहार 608 श्रद्धालुएं कल मत्था टेकेआ। 29 जून थमां शुरू होई दी इस यात्रा दरान अर्जे तगर 5 लक्ख 10 जहार 569 श्रद्धालु गुफा च मत्था टेकी चुके दे न। एह यात्रा 19 अगस्त गी रक्खड़ पुन्नेआ आले दिन सम्पन्न होई जाग। अज्ज जम्मू दे भगवती नगर आले आधार शिविर थमां श्रद्धालुएं दे नमें जत्थे गी घाटी लेई रवाना नेई कीता गोआ। 14 अगस्त गी छड़ी मुबारक जिसी इसलै श्रीनगर स्थित दशनामी अखाड़े च लोकें दे दर्शन लेई रखेआ गोदा ऐ, गी पवित्र गुफा च महंत दिपेन्द्र गिरी हुंदी अगुवाई च लेता जाग। ताई 480 श्रद्धालुएं दा इक होर जत्था पुंछ च श्री बुड्डा अमरनाथ जी दी यात्रा लेई रवाना होआ, एहदे च 334 मर्द, 141 महिला शामिल न।

<><><><><><>

## CBC Multimedia

जारी श्री मचेल माता यात्रा गी दिक्खदे होई पाङ्डर दे एसडीएम डॉ. अमित कुमार होरें पाङ्डर दे दूर-दरेडे इलाकें च 5एं दिनें दी मल्टी मीडिया प्रदर्शनी दा उद्घाटन कीता। एहदा आयोजन केन्द्री संचार ब्यूरो सीबीसी दे फील्ड दफतर डोडा आस्सेआ कीता गोआ।

<><><><><><>

## J&K World Record

जम्मू कश्मीर दे बारामुला जिले दे नोजवानें “कोशुर रीवाज” सांस्कृतिक उत्सव दरान 10 ज्हार नोजवान कुड़िएं किट्ठे कश्मीरी लोकनाच करदे होई यूनिवर्सल रिकार्ड फोरम च अपना नां दर्ज कराइयै नमां रिकार्ड कायम कीता ऐ। 78में स्वाधीनता दिवस दे सिलसिले च आयोजित “कोशुर रीवाज सांस्कृतिक उत्सव” च कीता गेदा अजें तोड़ी दा एह सब्बने शा बड्डा नाच रेहा जेहदे च 10 ज्हार कुड़िएं हिस्सा लैता। इस कार्यक्रम दा सरिस्ता फौज दी चिनार कोर दी डैगर डिवीजन आस्सेआ बारामुला जिला प्रशासन ते इन्द्राणी बालन फाउंडेशन दे सैहयोग कन्नै कीता गोआ जेहदी बड़ी मती सराहना कीती जा'रदी ऐ।

<><><><><><>

## Quiz Creative

जिला प्रशासन रामबन आस्सेआ शिक्षा विभाग दे सैहयोग कन्नै जिले च आकर्षक, जानकारी ते प्रेरणा देने आले बक्ख-बक्ख कार्यक्रमें दा सरिस्ता कीता ऐ। एह कार्यक्रम चार बक्ख-बक्ख सतहें-प्राइमरी, मिडल, सकैंडरी ते हायर सकैंडरी स्तर पर आयोजित कीते गे। सुआल-जोआब आली एह प्रतियोगिता स्कूली स्तर पर शुरू होई जेहदे परैंत जोनल स्तर दे मकाबले होए ते खीरै च जिला प्रशासनिक परिसर रामबन च जिला स्तर दे फाइनल मकाबले होए। शुरूआती राउंड च जेत्तु रेह दे बक्ख-बक्ख जोन दे प्रतिभागिएं फाइनल क्विज च हिस्सा लैता।

<><><><><><>

## Tributes Nud

राश्ट्र लेई सर्वोच्च बलिदान देने आले शहीद कौशल सिंह होरें गी श्रद्धाजलि देने लेई सरना नड इलाके च उंदे शहीद स्मारक पर इक कार्यक्रम दा सरिस्ता कीता गोआ। सांबा दे डिप्टी कमीशनर अभिषेक शर्मा हुंदे निर्देशों पर आयोजित इस कार्यक्रम च 50 विद्यार्थिएं ते सरकारी हायर सकैंडरी स्कूल सरना ते मिडल स्कूल बाडला

ब्राह्मणा दे शैक्षिक अमले नै बी हिस्सा लैता। सांबा दे मुख्ख शिक्षा अधिकारी केवल कृष्ण हुंदी अगुवाई च इक डेलीगेशन नै शहीद गी श्रद्धांजलि अर्पित कीती। इस मौके पर शहीद दे पिता होरें गी सम्मानत बी कीता गोआ।

<><><><><><>

## Olympics

पैरिस ओलंपिक्स अज्ज संपन्न होआ करदा ऐ। समापन समारोह् भारती समें मताबक रातीं साढ़े 12 बजे शुरू होग। समारोह् च केई मन्ने परमन्ने दे कलाकार अपनियां प्रस्तुतियां देंगन ते इस मौके पर तकरीबन 30 ज्हार दर्शक मजूद होंगन। समापन समारोह् च परेड लेई भारत थमां दऊं बारी ओलंपिक्स दा तगमा जित्तने आले पी. आर.श्रीजेश ते मनु भाकर होरें गी चुनेआ गोदा ऐ। श्रीजेश हॉकी टीम दे गोलकीपर रेह् न ते उनें पैरिस ओलंपिक च टीम आस्सेआ कैह् दा तगमा जित्तने परैंत सन्यास लैने दी घोषणा कीती ऐ। मनु भाकर कुसै ओलंपिक च दऊं तगमे जित्तने आली पैह्ली भारती खडारन न। समापन समारोह् च ओलंपिक्स दी मशाल स्थाली दित्ती जाग ते ओलंपिक्स दा झंडा लॉस एंजेलिस च 2028 च होने आले ओलंपिक्स खेड्डें दी आयोजन समिति गी सौंपी दित्ता जाग।

<><><><><><>